



CONVENIO DE COLABORACIÓN ENTRE A CONSELLERÍA DE POLÍTICA SOCIAL E A ASOCIACIÓN DE NAIS E PAIS DE ALUMNOS "PÍA DA CASCA" DO CENTRO DE EDUCACIÓN INFANTIL E PRIMARIA AS MERCEDES, RELATIVO Á UTILIZACIÓN DAS INSTALACIÓNS DO COMEDOR E DO SALÓN DE ACTOS DA RESIDENCIA XUVENIL FLORENTINO LÓPEZ CUEVILLAS PARA O CURSO ACADÉMICO 2017/2018.

Santiago de Compostela, 11 de setembro de 2017

REUNIDOS



Dunha parte, a Consellería de Política Social, e no seu nome e representación o Sr. Francisco Javier Abad Pardo, en virtude do seu cargo de secretario xeral técnico da Consellería de Política Social, para o que foi nomeado polo Decreto 140/2015, de 8 de outubro, no exercicio das facultades que lle confire o artigo 1, letra i) da Orde de 3 de marzo de 2016 sobre delegación de competencias nos órganos de dirección e nos/as xefes/as das xefaturas territoriais da Consellería de Política Social e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991 e de conformidade có establecido no Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia e co Decreto 176/2015, do 3 de decembro, polo que se establece a estrutura orgánica da Consellería de Política Social.



E doutra, o Sr. José Antonio Vázquez Pérez, presidente da Asociación de Nais e Pais de Alumnos "Pía da Casca" do Centro de Educación Infantil e Primaria As Mercedes, actuando en nome e representación da mesma, segunda Acta de 16 de marzo de 2016.

EXPOÑEN

Primeiro. Que as Administracións Públicas poden celebrar convenios de colaboración coas corporacións locais ou con outros entes de dereito público e con persoas físicas ou xurídicas suxeitas a dereito privado, ao abeiro do disposto na Lei 40/2015, do 1 de



outubro, do réxime xurídico das administracións públicas e do disposto no artigo 4 do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público e máis no Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda do 8 de abril de 1991.

Segundo.- Que a Consellería de Política Social é o órgano da Xunta de Galicia ao que compete levar a cabo, entre outras, a súa política en materia de xuventude e segundo o disposto no Decreto 177/2016, do 15 de decembro, polo que se fixa a estrutura orgánica da Vicepresidencia e das Consellerías da Xunta de Galicia, e no Decreto 176/2015, do 3 de decembro, polo que se establece a estrutura orgánica da Consellería de Política Social, entre as súas competencias está a de apoio ao desenvolvemento da actividade xuvenil, así como o fomento da participación da xuventude na vida social.

Terceiro. Que a Asociación de Nais e Pais de Alumnos "Pía da Casca" do Centro de Educación Infantil e Primaria as Mercedes impulsa o servizo de comedor como unha colaboración da mesma co centro educativo e ante as necesidades dalgúns pais e nais.

Cuarto. A Lei 5/2011, do 30 de setembro, do patrimonio da Comunidade Autónoma de Galicia no seu artigo 37.1 recolle que sempre que non resulten necesarios para o desenvolvemento das actividades propias, poderá autorizarse o uso temporal dos bens do patrimonio da Comunidade Autónoma a persoas físicas ou xurídicas para a realización, sen ánimo de lucro, de actividades que satisfagan fins públicos e non resultasen contraditorias coa afectación do ben.

As autorizacións para o uso temporal dos bens do patrimonio da Comunidade Autónoma de Galicia entenderanse outorgadas en precario, é poderán revogalas libremente en calquera momento, sen que o interesado teña dereito a ningunha indemnización.





En consecuencia, ámbalas dúas partes acordan as seguintes

CLÁUSULAS

Primeira. Obxecto

O obxecto do presente convenio é establecer a forma e condicións de colaboración entre a Consellería de Política Social e a Asociación de Nais e Pais de Alumnos "Pía da Casca" do Centro de Educación Infantil e Primaria As Mercedes, en adiante ANPA, para a utilización gratuíta por parte desta última das instalacións do comedor e do salón de actos da Residencia Xuvenil Florentino López Cuevillas, sita na cidade de Ourense.

Segunda. Uso do comedor da Residencia Xuvenil Florentino López Cuevillas.

1. Os alumnos e alumnas que poderán gozar do servizo de comedor da Residencia Xuvenil Florentino López Cuevillas serán seleccionados/as pola ANPA segundo o procedemento establecido pola entidade, cun límite máximo de 60 alumnos e alumnas por día. A ANPA deberá comunicar cunha antelación mínima dun día o número de alumnos/as que cada día van utilizar o servizo de comedor.

2. En todo momento, os alumnos e alumnas que gocen do servizo de comedor estarán baixo a supervisión dunha persoa responsable designada pola ANPA, quen velará polo cumprimento do acordado no presente convenio así como das normas de réxime interno que rexen para a residencia xuvenil. Semanalmente a ANPA comunicará á dirección da residencia xuvenil coa antelación a relación de persoas que realizarán esa supervisión.

3. A utilización do servizo de comedor establecida no presente convenio coincidirá coa data da súa sinatura e coa de remate do curso escolar 2017/2018.

4. O horario do comedor será desde as 14:30 horas ata as 15:30 horas, establecéndose unha marxe de cinco minutos tanto para a entrada como para a saída



dos alumnos e alumnas. Por mutuo acordo entre a dirección da Residencia e a ANPA poderase establecer o horario de comedor entre as 14:00 e 15:30 horas, dividindo aos alumnos en dúas quendas de aproximadamente 30 alumnos/as cada unha delas, sempre que non xurdan problemas de espazo no comedor. De producirse estes, a dirección da Residencia poderá acordar voltar ao horario inicialmente pactado de 14:30 a 15:30 horas, comunicándollo á ANPA cunha antelación suficiente.

Terceira. Contratación servizo de manutención

1. Corresponderá a ANPA a organización do servizo de manutención dos/as alumnos/as, mediante a contratación dunha empresa de catering, a que lle servirá o xantar ao alumnado e prestará o servizo de persoal e utensilios necesarios, debendo, ao finalizar o xantar de cada día, deixar todo en condicións de limpeza e orde.

2. A ANPA deberá comunicarlle á dirección da Residencia, con antelación suficiente, o nome da empresa que prestará o servizo de catering, así como calquera modificación na relación contractual que se produza durante o curso académico.

3. Non se establecerá un vínculo laboral entre a Xunta de Galicia e o persoal da empresa que se encargue da prestación do servizo de manutención e atención os/as alumnos/as durante o tempo da prestación na Residencia, nin adquirirá en ningún caso calquera tipo de dereito ou mérito para o acceso a condición de persoal da Xunta de Galicia.

Cuarta. Utilización do salón de actos da Residencia xuvenil Florentino López Cuevillas.

Igualmente, o salón de actos poderase utilizar para actividades escolares ou extraescolares pola ANPA coas condicións de que o soliciten con suficiente antelación á dirección da Residencia e que os/as alumnos/as veñan acompañados de persoal da ANPA ou do colexio que se responsabilice deles. Deberán respectarse as instalacións





e as actividades que se fagan non afectarán ao normal funcionamento da Residencia Xuvenil.

A utilización do salón de actos establecida no presente convenio coincidirá coa data da súa sinatura e coa de remate do curso escolar 2017/2018.

Quinta. Póliza de seguro.

En todo caso, a ANPA subscribirá unha póliza de seguro para cubrir tanto a responsabilidade civil como os posibles accidentes, así como calquera outra que se poida derivar dos danos ocasionados polo uso do local nos que poidan estar incursos os alumnos e alumnas que gocen do servizo de comedor por un mínimo de cento cincuenta mil euros (150.000 €).

Sexta. Comisión de seguimento.

1. Constitúese unha comisión de seguimento e control, que levará a cabo o seguimento do presente convenio e resolverá os problemas de interpretación e cumprimento que se poidan presenta.

2. A comisión estará composta por un representante de cada unha das entidades asinantes do convenio. A referida comisión estará presidida pola persoa titular da Dirección Xeral de Xuventude, Participación e Voluntariado, ou persoa que a substitúa. e actuará como secretario/a un/unha funcionario/a do Servizo de Xuventude e Voluntariado da Xefatura territorial da Consellería de Política Social de Ourense.

Sétima. Vixencia do convenio.

A vixencia do presente convenio iniciarase o día da sinatura do convenio e rematará o día de finalización do curso escolar 2017/2018.

[Handwritten signature]





Oitava. Resolución do convenio.

As partes poderán denunciar e resolver o presente convenio en calquera momento, de acordo co establecido no artigo 51 da Lei 40/2015, do 1 de outubro.

A utilización gratuíta por parte da ANPA das instalacións do comedor e do salón de actos da Residencia Xuvenil Florentino López Cuevillas realízase en réxime de precario polo que o incumprimento das obrigas establecidas neste convenio por parte da ANPA suporá a resolución do mesmo por parte da Consellería de Política Social sen que a ANPA teña dereito a indemnización algunha.

Novena. Natureza. Lexislación aplicable.

O presente convenio terá natureza patrimonial, rexéndose os seus efectos polo establecido nas súas cláusulas e aplicando a Lei 40/2015, do 1 de outubro e a Lei 5/2011, do 30 de setembro.

De acordo co artigo 113.2 da Lei 5/2011, do 30 de setembro, as cuestións litixiosas derivadas do convenio relativas ás normas sobre competencia e procedemento resolveranse ante a xurisdición contencioso administrativa, logo de se esgotarse a vía administrativa.

De conformidade co artigo 113.3 da dita Lei 5/2011, do 30 de setembro, as cuestións sobre os dereitos de natureza civil, resolveranse ante a xurisdición civil mediante a interposición do recurso que legalmente corresponda, de acordo co establecido na Lei 1/2000, do 7 de xaneiro de axuízamento civil.

Décima. Publicidade.

1. A ANPA consinte en que este convenio se inclúa e faga pública no Rexistro de Convenios, de acordo co establecido na Lei 1/2016, do 18 de xaneiro, de



transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia

2. O convenio quedará sometido en canto a publicidade do mesmo ao establecido no artigo 15 da Lei 1/2016, do 18 de xaneiro, e polo tanto a Consellería de Política Social informará na súa páxina web oficial da subscrición do presente convenio cos seguintes datos básicos: identificación das partes, importe do financiamento, data da sinatura, finalidade e período de vixencia. A sinatura do convenio leva implícita a autorización para o tratamento necesario dos datos e a referida publicidade.

Un décima. Protección de datos de carácter persoal.

1. En aplicación deste convenio respectaranse cantas esixencias establece a Lei Orgánica 15/1999, do 13 de decembro, de protección de datos de carácter persoal, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte alteracións, perdas, tratamentos ou accesos non autorizados.

2. As partes asinantes do convenio autorizan que os seus datos persoais e as demais especificación contidas neste convenio poidan ser publicados no Portal de Transparencia e Goberno Aberto.

E en proba de conformidade, ambas as dúas partes asinan por triplicado exemplar o presente convenio no lugar e data arriba indicados.

O secretario xeral técnico
da Consellería de Política Social



Francisco Javier Abad Pardo

O presidente da ANPA "Pía da Casca"

José Antonio Vázquez Pérez